

## Fujion Poza e Vich: referendum jà chest uton

L referendum per la fujion é stat antizipà e i aministradores se à enjgnà per enformèr i sentadins coche carenea



*L grop de lurier metù sù da la aministrations de Poza e Vich per se enjgnèr al referendum per la fujion di doi Comuns.*

**Sèn Jan** - L sarà la pruma metà de november, se no pa adertura la seconda metà de otober, l referendum per ge domaner ai sentadins di pajes de Pera, Poza, e Vich se i é a una de se meter adum te un soul Comun.

La comunicazion é ruèda dal servije Enc Locai de la Provincia de Trent e la antizipea donca i tempes, ajache te la delibera aproèda dai Consees di Comuns de Vich e de Poza ai 14 de jujn ge vegnia domanà a la Jonta regionèla de fèr l referendum d'aisciuda del 2017, ence per aer l temp de ge sporjer la drete informazion a duc i sentadins.

La data avisa no é amò stata fata fora, podessa esser adertura che l vegne endrezà ensema con chel naziònel per la reforma de la Costituzion, ma no l'é amò nia de segur. Se sà enveze la rejons de l'antizipazion, ajache per la fin de l'an la Provincia la vel esser vertia a peèr via definitivamenter con la gestions sozièdes, e per fèr chest tant la vel aer jà sun desch l'ejit di referendum per la fujions di Comuns che l'é pervedù sun dut l tegnir provinzièl, per poder dezider i ambic.

Ence te noscia val, defat, te chest moment per la gestions sozièdes dut l'é cet apontin aldò del projet de fujion de la Val de Sot. Se sà che l'é stat domanà na deroga al numer de amancol 5000 sentadins pervedui per fèr n ambit, ma che Daldoss no l'aessa chela de la conzeder, donca se passa la fujion de Poza e Vich (e en cajo de etres Comuns che volessa

se jontèr ite) duc i etres Comuns fascegn cognessa se meter adum te n ambit unich.

N'otra neva segura respet a la pruma proponeta l'é che – descheche perauter l'era jà stat metù en cont da la doi aministrations – l nef Comun no l podarà tor sù l'inom "Fassa/Fascia", contra chel che etres ombolc fascegn e la medema procuradora Elena Testor se aea remì. Te chest moment l'é amò sun desch dotrei proponetes per l'inom, ma la dezijion vegnarà touta dò aer sentù i Consees di doi Comuns.

Aldò de la neva calendarisazion, la aministrations de Vich e Poza se à jà enjgnà per ruèr a enformèr delvers la popolazion sun chel che comportassa chesta fujion, tolan dant vantajes e dubies.

L grop de lurier, coi ombolc Leopoldo Rizzi e Giulio Florian, i conseieres de maoranza Enrico Battisti, Simone Zulian e Bruno De Nardin, e i raprejentanc de la mendranzes del Consei Franco Lorenz e Norbert Bernard, se à binà en mèrtesc per meter jù n volantin informatif che vegnarà dat fora ai sentadins e n calandèr de scontrèdes con la popolazion.

Tel volantin vegn spiegà che se trata de n passaje sostanzialmenter technic, aministratif e de gestion, e donca i sentadins arà semper l medemo pont de referiment che i à ades, tant per se oujer a l'aministrazion, che per l sentiment de partegnuda a sie paisc, frazion o ciampanil. Meter ensema la forzes permetarà ampò de smaorèr

capazità e competenzes, aer jent più enjgnèda e dachelanvia ence maor autonomia aministrativa, senza cogner semper domaner a Trent.

La fujion permetessa de gestir e goernèr miec adum la infrastructures che jà é al servije de la doi comunanzes e de programèr i intervenc che joa de più a dut l teritorie, mioran l raport anter i pajes, che i aessa duc n peis più equilibrà.

Dut chest e outra costions, domanes e dubies vegnarà deschiarii miec ai sentadins te la scontrèdes: l prum apuntament l'é en program en jebia ai 18 de aost da les 21.00 te la Scolina Don Edy Cinzol de Pera; la jebia dò, ai 25, la scontrèda sarà da la medema ora te Comun de Poza e en mèrtesc ai 6 de setember da les 20.30 i se binarà te sala del Consei de Comun a Vich. En jebia ai 15 de setember, semper da les 20.30 i sarà endò te Scolina de Pera e dapò sarà amò doi apuntamenc, respetivamenter a Poza e a Vich, semper te senta de comun da les 20.30, ai 27 de setember e ai 6 de otober.

Duta la popolazion é envièda se sà ben de cher a chesta scontrèdes, per se enformèr e poder tor pèrt con convinzion e segurezza al referendum. Apede chest l'é en program de outra scontrèdes aposta con i Studafech, la Museghes, la Scola e outra sociazions e istituzions, te la consaputa che chest l'é n moment dassen emportant per l davegnir de noscia comunanzes. (lg)